

Stgars resultat tar l'iniziativa da la «vatga da latg»

Tavau: Radunanza generala da la pld grischuna

DA GION NUTEGN STGIER / ANR

■ **Trais giadas in NA e duas giadas in GEA èn las parolas da la pld grischuna tar ils tschintg projects da votaziun dals 5 da zercladur 2016. Quitads fan a la pld er il regress da la taglia chantunala. En nagin cas haja il maun public da sustegnair manaschis privats sco per exempel pendicularas.** En ses pled d'introducziun ha *Bruno Claus*, il president da la pld grischuna, ditg che la direcziun da la pld haja sapientivamain tschernì Tavau per la radunanza generala 2016. A Tavau hajan lieu en intgins dis elecziuns communalas, quai che saja ina buna raschun da sa mussar solidaric cun candidats e candidatas da la pld. Ultra da quai saja Tavau la «fortezza» da la pld e dals liberals. A pled è er vegnì *Tarzius Caviezel*, il landamma da Tavau. El ha ditg che da las consequenzas da l'iniziativa da las abitaziuns secundaras saja er Tavau pertutgà fitg e che pervia da quella gajan a perder 300 plazzas da lavur. En l'avegnir haja la vischnanca grondas sfidas, e quai saja da mantegnair las 450 plazzas da la perscrutaziun, las trais clinicas da sanadad e lura cunzunt il Forum mundial d'economia. Il lieu haja en ils proxims onns da far investiziuns per ina summa da bunamain 100 milliuns francs e quai saja per la vischnanca in grond pensum. Tranter auter sajan quai investiziuns tar il center da congress e l'Arena Vaillant.

Candidats sco referents

Ils tschintg projects da las votaziuns federalas dals 5 da zercladur 2016 èn vegnids preschentads da quatter candidats ed ina candidata che candideschan per las tscherinas en la legislativa da la vischnanca da Tavau. L'iniziativa dal pievel «A favur dal ser-

vetsch public» han ils 40 delegads refusà be cun ina cuntervusch. Unanim è lura vegnida refusada l'iniziativa dal pievel «Per in'entrada da basa nuncundiziunada». Tensiun è lura stada tar la decisiun da l'iniziativa dal pievel «Per ina finanziaziun gista dal traffic», er enconuscenta sco l'ini-

ziativa da la «vatga da latg». A la fin han ils preschents refusà quella cun in resultat da 24 NA cunter 17 GEA. Acceptadas unanim èn vegnidas las duas ulteriuras iniziativas, la midada da la lescha federala davart la reproducziun cun assistenza medicala sco er la midada da la lescha d'asil.

Adina damain commembers

Las tractandas statutaricas da la radunanza generala han chaschunà naginas pli grondas discussiuns. L'onn da gestiun ha la pld grischuna terminà cun in gudogn da passa 3000 francs, quai tar entradas ed expensas da var 300 000 francs. Da preschent haja la pld bunamain 1600 commembers e la realitad saja ch'ella perdia dad onn tar onn commembers, ha ditg Bruno Claus. *Rudolf Kunz*, il schef da fracziun da la pld grischuna, ha dà in sguard enavos a las activitads politicas da l'onn passà. Ils deputads e las deputadas sajan sa radunads sis giadas tar in di da fracziun e 18 dis saja stà sessiun en il cussegl grond. Las partidas hajan inoltrà 71 postulats e 67 ordinaziuns. Quitads fa a Kunz la realitad che las entradas da la taglia tar il chantun èn sa diminuidas per 17 milliuns francs. La situaziun da l'economia grischuna saja er intscherta. En mintga cas na duess il maun public betg sustegnair manaschis privats sco per exempel la vischnanca da Val las pendicularas. Quai na dastgia betg davantar ina obligaziun. En scadin cas na saja la pld betg quella che vegnia in di cun quella proposta, ha accentuà Kunz, il deputà da Cuir. Gratulaziuns dal president Bruno Claus e da tuts preschents han retschet las duas secziuns giubilaras da la pld, la pld da las dunnas sco er la pld dals giuven, omaduu che festiveschan quest onn il giubileum da 30 onns.



Il schef da fracziun da la pld grischuna Rudolf Kunz (a san.) ed il president Bruno Claus èn cuntents cun l'onn da gestiun da la partida.

FOTO G. N. STGIER